

Co chattar in emprendissadi en temps da corona?

(rtr/fmr) Per chattar emprendistas ed emprendists èn intginas fatschentas idas l'onn passà novas vias ed han nizzegià las pussaivladads digitalas. La pandemia difficultescha l'occupaziun da las plazzas d'emprendissadi en Grischun. Ma er senza corona ha inquala fatschenta da sbatter per chattar il persunal futur.

Naginas pussaivladads da fufragnar

L'onn passà han bleras fatschentas adina puspè stuì serrar las portas a persunas externas. Uschia n'èsi per part er betg stà pussibel per giuvenils da fufragnar. Enstagl da quai ha per exempel la Banca Chantunala Grischuna organisà ina occurrenza online. Questa primavaira ha quest barat digital tranter scolaras e scolars, geniturs, la banca e giuvenils che fan gia l'emprendissadi gè lieu per la segunda giada. «La finamira è da dar ina emprima invista en il mund da bancas», di *Matthias Schneider* da la BCG, «silsuenter ha la banca er purschì fufragnadis al lieu.»

Che las purschidas en la rait na pon betg remplazzar ils inscunters al lieu, da quel avis èn tuttas fatschentas dumandadas dad RTR. Il mument saja quai per part la suletta alternativa, per insumma pudair porscher insatge sumegliant sco p.ex. a messas da professiun.

Ulteriuras sfidas en periferia

Tant la Distec a Mustér, sco er las duas chasas da tgira Glienda ad Andeer ed Envia ad Alvagni han da sbatter per occupar al mument tuttas plazzas d'emprendissadi. Las raschuns èn enconuschentas: Las annadas vegnan pli pitschnas ed en la periferia èsi adina pli grev da chattar persunal, sco che las persunas responsablas han ditg sin dumonda dad RTR.

Cussegliaziun per video e telefon

(rtr/fmr) «Tge professiuns datti insumma? Tge vegn jau da far bain?» – Talas dumondas sa tschantan actualmain las scolaras e scolars dal stgalim superiur. Bleras da quellas respostas sa dar la cussagliaziun professiunala. «La situaziun actuala sa differenziescha quest onn dentant dals onns normals», di *Annette Decurtins*, cussegliadra da professiun, studis e carriera tar l'Uffizi per la furmaziun professiunala. Ella enconuscha las dumondas ed ils quitads dals giuvenils.

Ina consequenza dal home-office

Pervi da l'obligaziun da lavurar da chasa anora porscha er la cussegliaziun da professiun ses servetsch a moda digitala. Enstagl ch'ils giuvenils van tar la cussegliadra en il biro regional, datti ina cussegliaziun per telefon u video. Tut ils meds digitals che funcziunan e gidan,

vegnan nizzegiads. «Mes collegas da lavur ed jau avain constatà ch'ils giuvenils han rimnà l'ultim onn las abilitads da duvrar quels meds», di Annette Decurtins, «en general èn lur resuns buns.»

Dumber da plazzas sco adina

Malgrà la pandemia èn, sco Annette Decurtins declera, las dumondas dals giuvenils restadas las medemas. «Quai ch'è quest onn in zic auter è ch'ils giuvenils han uss per part pli grev a chattar plazzas per fufragnar.» Per consequenza han quels giuvenils tema da betg chattar ina piazza d'emprendissadi. Qua po la cussegliaadra però quietar: «Il dumber da plazzas publitgadas è varià mo minimalmain. Per l'onn 2021 eran publitgadas 971 plazzas, quai èn mo 39 damain che l'onn avant.» A giuvenils ch'èn en tschertga d'ina piazza d'emprendissadi cusseglia Decurtins da tschertgar il discurs cun manaschis u emprendistas ed emprendists pli vegls sco er da s'infurmar sin la pagina www.cussegliaziun.ch: «Sin quella chattan ils giuvenils bleras infurmaziuns en furma da texts, films e fotografias.»